

He Aha Te Mea Nui?

nā Henare Everitt

Kahukura

He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.



He whakarāpopoto

Pānuihia te whakarāpopoto ki te ākonga. I riro i a Mereana te whetū koura mō te wiki nā te mea i āwhina ia i a Ariā. Nā tāna mahi i ea tētahi tino whakatauāki. He aha taua whakatauāki?

He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou, me mahi rawa te papa kupu me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te tīmatanga ki te mutunga o te pānui.

Matapakia ngā whakaaro o ngā ākonga ki tēnei mea, te mea nui o te ao, me ē rātou whakaaro ki ngā kaupapa tērā tonu pea ka kitea i roto i te pukapuka nei.

Matapakia te hiranga o te āwhina a tētahi i tētahi atu, me te matapaki hoki ko tēhea te mea hira ake, te āwhina i te tangata, te whiwhi utu rānei (pēnei i ngā whetū koura).

Matapakia ngā momo tāngata e āwhinatia ana e rātou me ngā huarahi āwhina e whāia ana e rātou.

He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga mō tana tiro ki mua i whakaputa ai ia i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te

- mīhini rīpene kōrero, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga me ngā whakautu

1. I riro i a wai te whetū koura?
2. Nā te aha i riro ai i a ia taua whetū?
3. He aha te tikanga nō mua kua ngaro haere?
4. He aha te painga o te kōrero a Mereana?
5. Ki tōu whakaaro, he aha e kī ai te whakatauāki ko te tangata te mea nui o te ao?

1. I riro te whetū koura i a Mereana.
2. Nā te mea nāna a Ariā i āwhina kia piki ai tōna kōrea ki te rūma.
3. Kia kaha ki te āwhina i te tangata ahakoa ko wai.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

Te pūtake

T He āta titiro, he tautuhi i ngā ariā matua mai i te pukapuka.

He whakatakinga ā-roto, he whakaharatau

I mua i te pānui i te pukapuka, matapakia te whānuitanga o ngā momo hauā me ngā whakaaro o ngā ākonga ki ngā tāngata hauā. Matapakia te hiranga o te mārama haere ki ngā kare ā-roto o ētahi atu me te noho māhaki (te kore takahi i te mana o tētahi atu).

Kia oti i te ākonga te pukapuka te pānui, matapakia te take i tapaina te pukapuka *He Aha Te Mea Nui?*

Matapakia ngā take i kī ai pea te pouako rāua ko Mereana e ngaro haere ana te tikanga.

Matapakia te take i kī ai a Mereana me tiri taua paraihe i waenganui i ōna hoa.

Matapakia ngā huarahi ka whāia pea e ngā ākonga ki te āwhina i ērā atu ākonga hauā me ngā momo whakapaipai ake i te taiao o te kura kia pai ake te kura mō aua ākonga hauā.